

En 406, pòbles barbares van passar lo Rhin e s'esparricar sus la Gàllia. Son los Suèves, los Alans, los Vandales e los Visigòts. Dins aquera tempsada, Tolosa ei defenduda peus poblants coratjoses e valents mès tanben peu son avesque Exupèri.

Los Vandales seràn caçats en Espanha mès los Visigòts, armada remirabla, introducida dambe l'acòrd de Roma, s'instalan a Tolosa e i bastishen la capitala deu son reiaume.

Los reis que regnan a Tolosa son :

- Valià (418),
- Teodoric Ièr (418-451)
- Torismond (451-453)
- Teodoric IIau (453-466)
- Euric (466-484)
- Alaric IIau (484-507)

Los Visigòts son un ancian pòble germanic vengut de la branca deus Gòts. Apareishen dins l'istòria a la fin deu sègle IIIau, las suas originas son situadas en Escandinàvia, s'estabilizan un moment còsta Danubi.

La sua religion ei l'arianisme. A la diferéncia deus crestians, pensan que Diu, lo pair, es superior a Jèsus, lo hilh. Que l'un ei inferior a l'aute. Aquera religion correspon a ua fòrma de politeïsme entaus crestians.

Los Visigòts s'opausan a Roma de 396 a 410, e prenguen Roma en 410.

Puèi, conquistan la Gàllia e s'i installan coma federats (associats) a Roma.

En 418, un tractat, foedus, ei signat entre l'emperaire roman Honorius e Valià lo visigòt.

Los Visigòts s'installan dins lo sud-oèst de la Gàllia e Tolosa deveng capitala.

Teodoric Ièr e lo generau roman Aetius lutan contra Attila, rei deus Uns, lo 22 de junh de 451 a la batalha deus Camps Catalaunics. Pendant aquera batalha, Teodoric morish. Los Uns son hòra-bandits de la Gàllia.


Teodoric IIau installa Tolosa dins ua mes bèra autonomia. Constrush lo son Palais Reiau descobert au moment de la destruccion de l'ancian espital Larey a Tolosa en 1987. Aqueste palais hasèva 90 mètres de façada e 30 de pregondor, avèva longas galerias laterals, e ua fòrça bèra entrada virada de cap tà Garona.

En 403, la basilica Sent-Sarnin, acabada de bastir per Exupèri ei inaugurada. Las duas glèisas de la Daurada e Sent-Pèir de las Cosinas datan tanben d'aquera epòca.



Glèisa de la Daurada - Tolosa

Jòc



Horizontalement

2. Tractat de federacion.
5. Religion deus Visigòts.
7. Nom de l'autor deu tractat de leis.
13. Prumèr rei visigòt a Tolosa.
14. Vila de l'escritura deu tractat de leis.
15. Prumèr rei crestian.
17. Grope de barbares que s'instalarà en Africa deu Nòrd.
18. Reina estranha.
19. Nom d'un avesque de Tolosa.
20. Rei de la terror.

Verticalement

1. Capitala visigòta
3. De pèiras e d'aur.
4. Prumèra basilica de Tolosa
6. Capitala transalpina.
8. Lòc de la mòrt d'Alaric.
9. Pòble successor.
10. Fluvi plan coneishut peus ancians gòts.
11. Tractat de leis
12. Tribua que semoava la paur en 451.
16. Devath las pèiras un palais.

Tolosa ad aquesta tempsada ei ua ciutat activa ont coabitin gallò-romans e visigòts.

Los Visigòts se remercan peu son long peu e los sons uèlhs clars. Son vestits de pèths, de peliças l'ivèrn e son remarcablament cresents e supersticiosos.

Un personatge demorat famós ei la Reina Ragnachide, hemna de Teodoric IIau. Se disèva qu'avèva los pès palmats. Aquò li valoc lo chafre de Reina Pèdauca (pè d'auca). Mes d'ua legenda li son associadas (un husèth tostemps plen e ua expression « deu temps que la Reina Pèdauca hilava ». Lo son sarcofage seré decorat dambe palmipèdes).

Lo reiaume deus Visigòts, de cap tà la fin deu sègle cincau, ei gigant. Va de la Lèira a Duraça e ocupa l'Espanha per la sua màger part.

Mès la fin deu reiaume visigòt ei pròcha, lo monde espera la venguda deus Francs catolics.

En 507, Clovis tua Alaric IIau a Vouillé. Ei la fin d'ua tempsada de las bèras per Tolosa. Ne serà pas mes un reiaume mès ua vila de província, ciutat coma las autas.

Lo breviari d'Alaric : Alaric va escrìver, a Aire en Gasconha, un recuelh de leis, en partidas tiradas deu dreit roman, qu'aurà lo meriti de s'aplicar a tot lo monde dins lo reiaume. Avant, cada pòble avèva las suas règlas. Aqueth breviari serà utilizat dinca 1789 dins lo sud de la França.

Quinas son las originas deus Visigòts ?

Coma los Visigòts arriban a Tolosa ?

Qué se passa en 451 a la batalha deus Camps Catalaunics ?

Qué se passa a Vouillé en 507 ?

Qu'ei aquò lo breviari d'Alaric ?

LEXIC

Politeïsme : religion o idèa qu'admet l'existéncia de mes d'un diu.

Foedus : tractat d'aliança entre Roma e ua ciutat o un pòble estrangèr.

Breviari : un abracat, un somari que conteng un ensemble de tèxtes.

Sarcofag : ua caisha de pèira.



Mapa deu reiaume visigòt

FRISA CRONOLOGICA

235

prumèras invasions barbaras en Gaule, fin de la Pax Romana.

418

installacion deus Visigòts a Tolosa.

451

batalha deus Camps Catalaunics, Teodoric ei tuat per Attila.

476

caijuda de l'Empiri roman d'occident.

507

Clovis tua Alaric a Vouillé, lo sud-oèst de la Gàllia veng Franc.

